


**TEZAUROUR LITURGIC  
29 APRILIE**

**ACATISTUL  
SF.CUVIOS  
AMFILOHIE  
GOLOVATIUK  
DE LA  
POCEAEV  
I**



**MOSCOVA,2000**



# Акафист

**святыму преподобному**

**Амфилохию Почаевскому**

## Кондак 1

Избранниче Христов и обители Почаевский  
новый чудотворче, скорбящих скорый  
утешителю и недужных благодатный целителю,  
преподобне отче Амфилохие, любовию  
восхваляюще богоугодное житие твоє, песнь  
благодарения о тебе Богу приносим. Ты же яко  
дерзновенный к Нему молитвенник и теплый о  
нас ходатай, испроси всем с верою к тебе  
приходящим, от душевых и телесных зол  
свобождение, да выну зовем ти:

Радуйся, преподобне отче Амфилохие, теплый  
наш заступниче и предивный целебниче.

## Икос 1

Архангелу Рафаилу, молитвы страждущих  
Богу приносящему и здравие благодатию Его с  
небесе подающему, уподобяся преподобне, яко  
врач изрядный явился еси, исцеляющий наша

недуги многоразличныя. Мы же, поминающе преславное твоё житие, тако вопием ти:

Радуйся, земли Волынския святое прозябение; радуйся, родителей благочестивых чадо благословенное. Радуйся, измлада в вере истинней воспитанный; радуйся молитвенное делание и телесное воздержание издетска возлюбивый. Радуйся, от юности своея во благочестии просиявый; радуйся, добродетели родителей своих унаследивый. Радуйся, искусному врачеванию, отцем своим, обученный; радуйся, благоговению и кротости матери своея подражати тщавыйся. Радуйся, супротив похоти плоти, хранением девства и чистоты подвизавшийся; радуйся, на похоть очес целомудрием вооруживыйся. Радуйся, гордости житейской смиренномудрием противуставый; радуйся, Христовы заповеди боголюбия и братолюбия исполнивый. Радуйся, преподобне отче Амфилохие, теплый наш заступниче и предивный целебниче.

## Кондак 2

Видев на себе десницу Божию, выну тебе покрывающую, и скоротечность жития сего разумев, вся прелести мира лукаваго отвергл еси

и на святую гору Почаевскую пришел еси, да  
всего себе в жертву Творцу своему в чине  
иночеством принесеши, непрестанно поя Ему:  
Аллиуия.

## Икос 2

Разума совершенна взыскаху в тебе  
православни людие, видящии богоугодное тво  
житие. Ты же от обилия в сердце любви  
Христовы возымел еси о них отчее попечение. С  
высоты же небесныя дар духовнаго разсуждения  
восприим, сей достойно употребил еси в  
научение духовно младенствующим, сего ради  
похваляем тя, глаголющи:

Радуйся, смотрения Зиждителева  
исполнителю; радуйся, о спасении близких  
попечителю. Радуйся, Духа Святаго стяжателю;  
радуйся, во тме неверия блуждающих  
просветителю. Радуйся, скорбящих и  
обремененных утешителю; радуйся, ревностный  
христиан окормителю. Радуйся, Церкве земныя  
воителю; радуйся, полков демонских  
прогонителю. Радуйся, святых отец  
последователю; радуйся, еретиков льстивых  
обличителю. Радуйся, покаяния учителю;  
радуйся, от рабства греховнаго свободителю.

Радуйся, преподобне отче Амфилохие, теплый  
наш заступниче и предивный целебниче.

### **Кондак 3**

Силою Божиєю укрепляемый, на высоту  
безстрастия мужественно возшел еси, блаженне,  
также от Господа многия благодатныя дары  
прияв, спасению близких ими послужил еси,  
смиренномудренно воспевая Щедродателю Богу:  
Аллиуия.

### **Икос 3**

Имея врачеваний дарование, воистину, яко  
новый источник благодати, на горе Почаевстей  
явился еси, отче Амфилохие, к тебе бо во  
множестве различными недуги страждущии, с  
верою и упованием усердно притекаху, и силою  
благодатных молитв твоих, безмездно здравие  
приемше, в радости благодарения взываху:

Радуйся, силою Вышняго препоясанный  
неисцельныя недуги врачевати; радуйся, Того  
же властию оболченный и мертвяя воскрешати.  
Радуйся, слепыя зрячия сотворяющий; радуйся,  
глухим слух и немым язык отверзающий.  
Радуйся, кости сокрушенныя исправляющий;  
радуйся, хребты смяченныя укрепляющий.

Радуйся, сухия руце и нозе токов жизни исполняющий; радуйся, огнем опаленная телеса обновляющий. Радуйся, язвы и смрадныя струпы телесныя очищающий; радуйся, уды плоти растлевшия, и отсечены быти имущия, чудесне врачующий. Радуйся, разума лишившимся, молитвами к Богородице, ум здравый подающий; радуйся, страждущих от дух нечистых, именем Иисусовым свобождающий. Радуйся, преподобне отче Амфилохие, теплый наш заступниче и предивный целебниче.

#### **Кондак 4**

Даром прозрения, внезапу от Господа дарованным, буря нашествия иноплеменных тебе известися, с сего же часа издалеча зрел еси души и судьбы к тебе приходящих. И яко ревности о благочестии исполненный, грехи нераскаянных даром сим кротко обличал еси, да принесше достойный плод покаяния, чистым сердцем возвзовут Богу: Аллилуия.

#### **Икос 4**

Евангельских словес благоразумного слышателя и сих мудраго исполнителя, зrim в

тебе преподобне. Ихже ради на путь самоотвержения, лишений и скорбей ревностно возшел еси и за Христом неуклоно шествовал еси. Мы же, нерадящии о таковом восследовании своему Спасителю, во умилении и сокрушении сердец зовем ти:

Радуйся, желание быти со Христом выну имевый; радуйся, Того Единаго взыскати непрестанно тщавыйся. Радуйся, монашескаго послушания строгий исполнителю; радуйся, на ниве Христовой ревностный делателю. Радуйся, светозарное светило, руководяще нас ко спасению; радуйся, граде, стоящий верху горы, к нему же вернии притекают. Радуйся, солию благочестия, мир от растления душевнаго сохраняяй; радуйся, многих ревности по Бозе исполняяй. Радуйся, кротость и смирение Христово возлюбивый; радуйся, небесный покой еще в земнем житии обретый. Радуйся, реко благодати Божия; радуйся, из неяже и ныне верою напояемся. Радуйся, преподобне отче Амфилохие, теплый наш заступниче и предивный целебниче.

## Кондак 5

Боготечный защитник храма Святая  
Живоначальная показался еси, Троицы в Лавре святей  
показался еси, егоже от осквернения и  
запустения защитив, безбожныя гонители от  
дому молитвы дерзновенно отгнал еси и верныя  
люди до крове стояти за веру Христову призвал  
еси, безбоязнено поюще Триипостасному Богу:  
Аллиуия.

## Икос 5

Видевше в тебе хулители злочестивии  
ревностного защитника обители Почаевского, и  
споборника крепкаго народу Божию разумевше,  
досады суще делателие безумнии, потщашаясь  
соделати тя немощна, страждуща и безчестна;  
мы же песнь хвалы приносим ти глаголюще:

Радуйся, за безбоязненное веры исповедание  
пострадавый; радуйся, за Бога в Троице Святей  
славимаго, во узилище влекомый. Радуйся,  
заушения в подражание Господу Иисусу  
приявый: радуйся, с бесными и буими  
затворенный. Радуйся, в жестоких мучениях  
долготерпевый; радуйся, в лютых злостраданиях  
не роптавый. Радуйся, на мучители твоя не

озлобивыйся; радуйся, любве божественныя преисполненный. Радуйся, в долговременных злоключениях духовно бдевый и моливыйся; радуйся, Богородицу на помощь выну призывавый. Радуйся, все упование свое на Господа возложивый; радуйся, в вере и надежде своей не посрамивыйся. Радуйся, преподобне отче Амфилохие, теплый наш заступниче и предивный целебниче.

### **Кондак 6**

Проповедник покаяния и жития благочестного учителя показался еси, отче Амфилохие. Прежде бо исцелений телесных, исцелял еси души к тебе приходящих, от грехов и беззаконий. К сему же научал еси, яко скорби и болезни постигают нас за презрение жития богоугодного, егоже покаянием взыскати призывал еси, да сих избавльшеся, в радости воспоем: Аллилуя.

### **Икос 6**

Возсиял еси разсуждением духовным, от Господа тебе дарованным, егоже на душепопечение направляя, рабского плена работы страстем послушающих тя, благодатно

свобождал еси. Ныне же достохвальная словеса от нас приими:

Радуйся, смирения и любве мечу обоюдоострый, козней вражиих посечение; радуйся, Апостолов подражателю, веры православныя утверждение. Радуйся, мужественный подвижниче, обетов монашеских ревностное исполнение; радуйся, Ангелов собеседниче и ангельский образ носящих наставниче. Радуйся, верный рабе Божий, исповедников наследниче; радуйся, отче милосердый, преподобных сопричастниче. Радуйся, священниче Богом поставленный, Жертву Безкровную за люди непорочно приносити; радуйся, пастырю добрый, душу свою за словесныя овцы Христовы готовый положити. Радуйся, врачу благодатный, водою и брашном, молитвою освященными, болеяния исцелявый; радуйся достойный пресвитере, силою благодати Божия скоро тем помогавый. Радуйся, Богодарованный источник, животворный и целительный; радуйся, любве Христовы преисполненный, падшая возставивый и отчаявшаяся ободривый. Радуйся, преподобне отче Амфилохие, теплый наш заступниче и предивный целебниче.

## Кондак 7

Хотя в сердце своем со Христом соединитися, непрестанно имя Его Сладчайшее усты призывал еси и огнем благодати Божия душу свою в достойный храм Сему предочистил еси. Сего ради и нас научаеши, ум и сердце от мира греховнаго отвращати и к Богу устремляти, дабы в вечном радовании пети Ему: Аллиуия.

## Икос 7

Новое зерцало апостольского уготования и желания разрешитися и со Христом быти явился еси, преподобне, егда беззаконний и неблагодарний на монастырском кладбище хотяху тя, неповиннаго умертвiti. Но подвигом любве жертвенныя, сокелейника твоего Иринарха, от неумолимыя смерти спасен был еси. Сим образом и мы, в преданости Богу утверждаеми, глаголем ти сице:

Радуйся, Христа от юности своея возлюбивый; радуйся, душу и живот свой Ему всецело предавый. Радуйся, волею своею Господу поработивыйся; радуйся, в непрестаннем упновании на Него утвердивыйся. Радуйся, прежде смерти для мира греховнаго

умерый; радуйся, жизнь вечную еще в земнем телеси во Христе обретый. Радуйся, образе совершенныя веры и любве; радуйся, зерцало непостыднаго упования. Радуйся, смирения Христова наследниче; радуйся, милосердия Его подражателю. Радуйся, непрестанную память о смерти стяжавый; радуйся, сетей вражиих сею избегнувый. Радуйся, преподобне отче Амфилохие, теплый наш заступниче и предивный целебниче.

### **Кондак 8**

Странное чудо является, блаженне, имя твое вкупе с Преблагословенной Богородицей и преподобным Иовом, молитвенно призывающим: малое бо приносяще вам прошение, абие таковым сугубым представительством, от велиих скорбей и недугов приемлем скорое избавление, да вопием о вас Богу радующеся: Аллилуия.

### **Икос 8**

Весь любве Божественныя исполнен, свято окормлял еси людей множества, яко к старцу духоносному, во изгнание твое, в Мало-Иловицкую весь, к тебе притекающих. Ты же

нужды их милостивно удовляя, к житию богоугодному многих приобщил еси. Тако и мы житием твоим, в истине и благочестии утверждаеми, зовем ти сице:

Радуйся, новый безсребренниче, болезни наша исцеляющий; радуйся, благовестниче изрядный, веру правую в земли нашей утверждающий. Радуйся, служителю Божий, всем себе поработивый и многи ко Христу приведый; радуйся, подвижниче кроткий, обидящих тя милующий и любящий. Радуйся, пастырю богомудрый, разум спасения людем подающий; радуйся, старче благодатный, души нераскаянных обновляющий. Радуйся, отче святый, сердца чад ко отцем обращающий; радуйся, учителю покаяния, кающимся совесть омывающий. Радуйся, пророче Бога живаго, страждущим милость изливающий; радуйся, громе богогласный, враги веры устрашающий. Радуйся, простоты стяжателю, премудрья века сего посрамляющий; радуйся, Истины служителю, смиренным разум озаряющий. Радуйся, преподобне отче Амфилогие, теплый наш заступниче и предивный целебниче.

## Кондак 9

Всяких зол и скорбей, житие твое бысть исполнено, преподобне, имиже демоны и злые люди уязвити тя тщащаясь, но ничтоже успеха, обретше в тебе твердый столп веры и неиссякаемый источник любве, в нихже паче возрастая и сугубыя благодати сподобляяся, даже до кончины своея блаженныя, в благодушии пел еси Богу: Аллилуия.

## Икос 9

Всякий день и час многия молитвы возносил еси, отче, ко Пречистой Владычице нашей Богородице, Ея величие и матернюю любовь к нам грешным восхваляюще. Ныне же тя о обители твоей, купно со Иовом преподобным, теплаго заступника и неотступнаго молитвенника к Ней разумеюще, тако вопием ти:

Радуйся, избранниче Божия Матере; радуйся, святыя обители Ея преславный воине. Радуйся, чудотворную икону Пречистыя свято почитавый; радуйся, и следу стопы Ея десныя, благоговейно покланявыйся. Радуйся, славу Приснодевы на всяк день воспевавый; радуйся,

на милость Ея упование свое полагавый.  
Радуйся, в подвигах монашеских и трудах  
исповеднических Иову преподобному достойне  
подражавый; радуйся, отца сего святаго,  
чудотворения дар восприяявый. Радуйся, на  
жатву духовную Господем посланный; радуйся,  
на ниве Христовой рачительно потрудивыйся.  
Радуйся, Царя Небеснаго благоволения искаявый;  
радуйся, мирския славы и хваления, юродством  
бегавый. Радуйся, преподобне отче Амфилохие,  
теплый наш заступниче и предивный целебниче.

### **Кондак 10**

Спасения нашего и ныне наставник буди  
преподобне, да зряще нетленное тело твое, от  
суетных и ложных мира сего отбегати  
научаемся; леность и небрежение о душе своей,  
трудом и молитвою попирая; о чистоте плоти и  
духа тщatisя, всем сердцем поучаемся, в  
надежди спасения, поюще Богу: Аиилуия.

### **Икос 10**

Стена нерушимая от находящих зол был еси,  
преблаженне: скорбящих утешая, болящих  
исцеляя, бесы изгоняя, и от напастей сохраняя.  
Даже до днесь силу Божию в тебе сущую, всем с

верою и любовию к тебе приходящим являеши,  
подвизая в благодарности пети тебе:

Радуйся, отче, яко еще живу ти сущу людие  
земли руссия к тебе притекаху; радуйся, яко и  
ныне, потоцы народов святыя Руси, ищущих  
исцелений у цельбоносных мощей твоих, не  
оскудевают. Радуйся, богоборцев лукавых  
обличителю; радуйся, богопротивнаго нечестия  
искоренителю. Радуйся, мир Божий в себе  
стяжавый; радуйся, сладость сию неизреченнную  
вкусити, многих сподобивый. Радуйся, в  
истинном смирении сердце свое утвердивый;  
радуйся, сим оружием, купно с молитвою,  
демоны поразивый. Радуйся, Отцу Небесному  
сыновне послуживый; радуйся, истинный  
Христа Спасителя учениче. Радуйся,  
благозвучный Духа Святаго органе; радуйся,  
чистое Святыя Троицы жилище. Радуйся,  
преподобне отче Амфилохие, теплый наш  
заступниче и предивный целебниче.

### Кондак 11

Песнь благодарения во всех обстоянніих  
скорбнаго жития своего, Подвигоположнику  
Христу, непрестанно приносил еси, угодниче  
Божий, мы же, обретше в тебе таковаго пред-

Богом заступника, и в находящих напастех защитника, по образу твоему, в скорбех и радостех своих, прилежим выну воспевати Господеви: Алиллуия.

## Икос 11

Светильник многосветлый явился еси, богоносе, зарями чудес и образом благочестия верныя просвещая. Но и по успении твоем не оскуде в тебе сия благодать, юже приходящим с верою ко гробу твоему щедро подаёши, да навыкнут славити Бога, всех чудес Источника, тебе же глаголати сице:

Радуйся, безсребренников и чудотворцев приемниче; радуйся, телес наших здравие и душ спасение. Радуйся, яко тобою от страстей телесных избавляемся; радуйся, яко тобою сладостей духовных исполняемся. Радуйся, обители твоая и веси отеческия славная похвало; радуйся, всех богомудрых премудрая доброто. Радуйся, многих от погибели исхитивый; радуйся, безчисленных неврежденно сохранивый. Радуйся, бесов многоплачевное поражение; радуйся, земли Волынских освящение. Радуйся, сияние, скорбный мрак разгоняющее; радуйся, светило, тьму безбожия

просвещающее. Радуйся, преподобне отче Амфилохие, теплый наш заступниче и предивный целебниче.

## Кондак 12

Благодатию в горниле скорбей, яко злато очищенный, венцем исповедничества и преподобия блистающий, по скончании своем возвратился еси в обитель Почаевскую. Волею же Божию во обретении нетленных мощей твоих в последняя лета нам явился еси, духовно всех утешая и пети Богу, дивному во святых Своих, воздвизая: Аллилуя.

## Икос 12

Поюще житие твое богоугодное и чудес множества, отче Амфилохие, восхвалити тя по достоянию недоумеем, но ведяще благоутробие твое к немощствующим, молимтися и ныне воспевающим тя ниспослати свою благостыню, да под молитвенным кровом твоим сохраняеми, в ревности о спасении, выну величаем тя званий сими:

Радуйся, Богом Отцем предъизбранный;  
радуйся, страдальческим житием  
предочищенный. Радуйся, душу свою за

ближния полагавый; радуйся, ныне же ю в раи  
обретый. Радуйся, Духа Святаго добротами  
блестающий; радуйся, Того же благодатию  
благоухающий. Радуйся, многими исцеленьми от  
гроба твоего источаемыми, свыше  
свидетельствуемый; радуйся, крестами  
облачными, в день земнаго прославления твоего  
явленными, от Небеснаго Отца прославленный.  
Радуйся, от Подвигоположника Христа  
увенчанный; радуйся, с праведными  
соприченный. Радуйся, во обители небесней  
блаженствующий; радуйся, у престола Святыя  
Троицы о нас ходатайствующий. Радуйся,  
преподобне отче Амфилохие, теплый наш  
заступниче и предивный целебниче.

### Кондак 13

О преблаженне отче Амфилохие, дивный  
целебниче и притекающим к тебе скорый  
помощниче, не лиши и нас, смиренно к тебе  
припадающих, своего благодатнаго посещения:  
болезни наша исцели, скорби утоли, жизнь  
умири; да представством твоим ко  
Всевышнему Владыце, от всякаго зла и лукаваго  
действа избавльшеся, во веки веков поем Ему:  
Аллиуия.

Сей кондак глаголем трижды, и паки: Икос 1 «Архангелу Рафаилу...», Кондак 1 «Избранниче Христов...»

## Молитва

О, всеблаженне отче наш Амфилохие, земный Ангеле и небесный человече! Припадаем к тебе с верою и любовию и молим ти ся прилежно: яви нам смиренным и грешным святое свое заступление; се бо грех ради наших не имамы дерзновения просити о потребах наших Господа и Владыку нашего, но тебе, молитвенника благоприятнаго, к Нему предлагаем и просим тя со усердием многим: испроси нам от благости Его благопотребная дары душам и телесем нашим, веру праву, любовь ко всем нелицемерну, в злостраданиях терпение, тяжкими болезнями одержимым - от недугов исцеление, под бременем скорбей и напастей неудобносимых падающих и жития своего отчаявшихся твоими молитвами получить скорое облегчение и избавление.

Не забуди, блаженне отче, и обитель сию святую, в ней же подвизался еси, присно тя чтущую, но соблюди ю и всех живущих и подвзывающихся в ней и на поклонение в ню

приходящих невредимыми от искушений диавольских и всякаго зла. Егда же приспеет наше от временнаго сего жития отшествие, и к вечности преселение, не лиши нас помощи твоей небесныя, но молитвами твоими всех нас приведи в пристанище спасения и наследники яви нас быти всесветлаго Царствия Христова, да поем и славим неизреченныя щедроты Человеколюбца Бога Отца и Сына и Святаго Духа и твоё вкупе с преподобным Иовом отеческое заступление во веки веков. Аминь.

